

Zapóslane

Jadwiga Pjacec z Radebeula wupraja so k rubrice Rozmyslowane we wudaću SN z 1. decembra:

Jako čitach artikl „Radšo projekty spěchować“ běch jara zastróžana. Nadawk nowin tola je, sej objektivitu při rozprawach zdžeržeć a na jednu stronu so njewusměrić, w tym padže na stronu Założby za serbski lud. Nadawk žurnalistow pak tež je dokładnje rešeršować. Fakt je, zo njeje awtor přinoška argumenty z pječstronskeho lista korektnje zrozumił a zo njeje tež objektivny wostał. Tuž njeje ze stron Janeka Wowčerja móžno, argumenty sprawnje do luda transportować. Čitach wosobinsce pječstronski list iniciatiwy Serbski sejm a móžu rjec, zo tam ani wumjetowanja ani hroženja njenamakach (spis steji pod www.serbski-sejm.de). Spis podawa argumenty, čehodla je demokratisce legitimowane zastupnistwo Serbow fundamentalne a čehodla je založba financować měła. Je wažne, zo ma kóždy Serb móžnosć, zamołwitosć za swój lud, swoju rěč a kulturu přewzać – a to tež w politiskim ramiku we formje demokratiskich wólbow, zo hodža so tak serbske zajimy narodnje a mjezynarodnje zastupować. Tež wjac hač třećina člonow Domowiny je so z podpismom na peticiji za demokratiske wólby ludoweho zastupnistwa wuznała. Druhe kraje kaž Belgiska, Finska, Italska, Šwedska atd. su tule formu ludoweje zamołwitosće hižo spóznali a wuspěšnje demokratiske wólby za zdžerženje svojich mjeńšin přewjeduja. Škoda tuž, zo je založba jenož za kulturne spěchowanje zamołwita a njespěchuje wólby, přetož demokratisce legitimowane zastupnistwo za serbski lud je wažny politiski a kulturny instrument k zachowanju našeho luda.